



PARTII INUIT INATSIARTUNI

Partii Inuit

UKA 2013/30-1

Randi Broberg

15. 10. 2013

Peqqissaasut Palliativ-imik nakorsaasinnaanermut ilinniaqqissinnaanerit anguniarlugu immikkut aningaasaliisoqarnissaanik Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Doris Jakobsen, Siumut)

Doris Jakobsen-ip Siumumiit, napparsimasut piartortut sullissisuisa ilinniarteqqinneqarsinnaanerinik siunnersuutaa ima Partii Inuit oqaaseqarfigissavarput.

Tunngaviusumik Partii Inuit isumaqarpugut, napparsimasut kikkulluunniit pittaanerpaamik ataqqinartumillu sullinneqarnissaat qulakkeersimajuassallugu pingaaruteqarluinnartoq. Uanilu pineqartut napparsimasut piartortut sullissisuisa ilinniarteqqittuarnissaannut tunngasoq, aamma tunngaviusumik isumaqatigaarput.

Immikkullu maluginiarparput siunnersuuteqartup taasai tassalu peqqissaasut nunaqavissut kiisalu kalaallisut oqaluttut Palliativ-imik nakorsaasinnaasutut ilinniartitaasinnaanermik immikkut periarfissinneqarnissaat ujartorneqartoq.

Isumaqarpugut apeqqut tunngaviusumik pingaaruteqarluinnartoq qaqqinneqartoq.

Tassami qujamasunnaqisumik peqqissaanermi suliallit nunaqavissut oqaatsitsinnik atuisut amerliartuinnarput. Tamannalu assut tulluusimaarutissaavoq, imminilu naleqaqaluni. Tassami kinaluunniit aamma napparsimasoq oqaatsini atorlugit sullinneqarnissaminut pisinnaatitaaffeqarmat aammalu oqaatsini atorlugit sullinneqaruni toqqissisimanerpaasarmat. Nalunngilarpummi peqqinnissaqarfimmi sulisunik amigaateqarneq aallavigalugu vikarinik sivikittuinnarmik nunatsinniittussanik amerlaqisunik akisoqisunillu tikisitsineq atugaasorujussuummat, tamannalu qaangeriartuaartariaqarmat, suliniutit assigiinngitsut nunaqavissunut nukittorsaataatut tamakkiisumik Partii Inuit tapersorsorluinnarpagut.

Taamaammat isumaqarpugut Partii Inuit, naalackersuisut siunnersuuteqartumut akissumminni atigartitsisumi suliap aallarereenera innersuussutigineqarmat, naalackersuisunut kaammattuutigisariaqarlutigu pingaarnarpaamik nunaqavissut salliutillugit peqqinnissaqarfimmi sulisunik ilinniartitseqqiinerit ingerlanneqartariaqartut, taakkunungalu nukiit annertunerpaat atortariaqartut. Tikisitanut sivikittuinnarmik nunatsinniittussanut aningaasat nukiillu atornissaaninngarnit.

Taamaammat tungaviumik suliniummut Naalackersuisut siammasinnerusumik aallaavilimmik, tassa peqqissaasuinnaanngitsut allalli sulisut pisariaqartinneqartussat pillugit qulaajaanerat isumalluarfigalugu, siunnersuut itigartikkallarparput. Naalackersuisullu akissuteqaataat tusaatissatut tigullutigu.